


元
和
姓
纂



元和進書



嘉慶七年刊版

元味姓纂

古歙洪氏校藏

金陵書局校刊

光緒六年工竣

校補元和姓纂輯本序

唐林寶撰姓纂其佚文存在永樂大典散附千家姓之下宋鄭樵作氏族略王應麟作姓氏急就章謝枋得作祕笈新書俱引其文又多爲永樂大典所遺今採輯諸書依林氏原書例先以當時皇族餘分四聲仍爲十卷其非永樂大典而見他書者注明出處唐時氏姓書尙多隋經籍志雖稱鄧氏官譜及族姓昭穆記晉亂已亡自餘亦多遺失而譜系篇所載尙有四十一部三百六十卷唐顯慶中詔呂才等撰姓氏錄開元中柳沖又改修其書天寶中李林甫亦撰天下郡望姓氏族譜林氏作書時當得見之其體例亦如元和郡縣志不載出典惟僻姓一二引姓苑風俗通及新說閒引當時家狀耳其書宋時尙存據書錄解題云在莆田以數本參校後又得蜀本校之互有得失然粗

完整是陳振孫見其完書鄭樵謝枋得等亦用之不知亡於何時蓋在元明之間矣唐會要以姓纂爲王涯撰因書有王涯序錄言之涯序稱相國趙國公創立綱紀區分異同以授博聞強識之士濟南林寶案書錄解題以爲宰相李吉甫以命寶二十旬而成書則以吉甫本趙郡人唐書世系表趙郡李氏定著六房宰相十七人吉甫相憲宗又吉甫本傳元和二年杜黃裳罷相乃擢吉甫知平章事故亦得稱趙公也涯序又稱濟南林寶書錄解題以爲三原林寶寶傳不見於史亦未知何以異至郡齋讀書志作十一卷則古人每兼序錄爲卷數不足異也姓氏與郡望相屬乃知宗派所出樂史作太平寰宇記載人物著姓於郡縣之下亦有深意三代以上官有世祿各居其國都自漢時徙豪右入關而郡望非其土著晉室板蕩中原大族半皆南

渡譜牒亡失北朝以三字二字複姓改爲一字或與古姓相亂
僅賴魏收官氏志以別之及宋南遷士夫復多喪其譜牒至明
太祖不能舉曾高之名其後官無譜局私撰家狀者率皆未見
古書不能遠考漢唐世數數典而忘其祖非族而神不歆實搢
紳先生之所恥自有此書出而譜牒一家之學不至失守矣永
樂大典引此書證之鄧名世古今姓氏書詳略互見當由輯錄
人有所去取且所遺著姓其見於祕笈新書及世族略者甚多
脫誤亦不少如洪姓監察御史洪察闕察字及避孝敬諱訛爲
避元宗諱之屬皆據祕笈新書訂正齊人孟軻字子展祕笈新
書作子輿亦兩存之此外有宋謝維新合璧事類類姓門亦引
古今姓纂按其詞有引通鑑云云則不盡林氏原書其廣韻所
引氏姓亦有林氏之文但不云出於姓纂不敢濫補吾友尙書

元利如集序
郎歛人洪瑩篤愛此書欲刊布傳遠與子增校條舉件繫日得
數十事二旬而畢猶有漏略當俟來者云

賜進士及第東方觀察使者署廉訪使舊史氏孫星衍撰

校補元和姓纂輯本後序

右唐林寶元和姓纂十卷永樂大典作十八卷今仍釐爲十卷
從其朔也唐書無寶傳其名見於藝文志唐會要訛作王涯撰
鄭樵通志作李林寶撰則以傳寫李吉甫林寶二名之誤樵譏
寶不知林氏所自出然樵作氏族略實祖之他如鄧名世之姓
氏辨證王應麟之姓氏急就章亦多引其文寶以二十句而成
書速於葢事先容齋嘗議其書多妄然陷而入于博亦賢者之
過也案班固古今人表有太師疵少師疆爲殷末之樂官顏師
古云卽論語太師摯諸人今按本書亞飯一姓云亞飯干殷末
賢人與漢書合又淮南王元覽改爲兀氏說文元从一兀聲徐
鍇以爲兀非聲不知元之可讀冗而髡之从兀卽近於元也今
元改爲兀元兀聲相近與說文合又其中引世本族姓記三輔

決錄以及百家譜英賢傳姓苑諸書多有不傳於今者賴其徵引尙可攷見至其載列唐人世系元元本本尤爲詳核唐藝文志譜牒類十七家三十九部一千六百一十七卷今均散佚漢晉以來譜系一家之學繫而不墜實賴此書之存黃伯思陳振孫雖稱無善本然全書未泯又散附千家姓之下錯見祕笈新書之中者甚夥毘陵淵如夫子以所藏鈔本見示因校而刊之蓋夫子以力學復古爲己任卽以此志勉瑩也刊旣成而述其略於簡末歛洪瑩識

元和姓纂原序

元和壬辰歲詔加邊將之封酬屯戍之績朔方之別帥天水閭
者有司建苴茅之邑於太原列郡焉主者旣行其制閭子上言
曰特蒙渙汗恩沾爵土乃九族之榮也而封乖本郡恐非舊典
翌日上謂相國趙公有司之誤不可再也宜召通儒碩士辯卿
大夫之族姓者綜修姓纂署之省閣始使條其原系考其郡望
子孫職位並宜總緝每加爵邑則令閱視庶無遺謬者矣寶末
學淺識首膺相府之命因案據經籍窮究舊史諸家圖牒無不
參詳凡二十旬纂成十卷自皇族之外各依四聲韻類集每韻
之內則以大姓爲首焉朝議郎行太常博士林寶撰

元和中政平刑清聖作賢輔盡雍容揚揄之美成緝熙愷樂之
化相國趙國公式是古訓毗于大君當八方之樞總萬物之會

嘗以聖明臨照思盡物宜每與羣公拱承顧問將謂經之於思慮不若著之以文辭著之以文辭不若驗之于圖牒昔漢祖所以知郡國豐耗山川險夷以蕭何得秦圖書可披而案之故也大凡邦國之會計可以備應對者著元和國計簿地形之遠近可以知要害者著元和郡邑圖洎百執事所蒞之司士大夫所分之隸族無不窮究其本末申明其憲度今之姓纂卽其一也趙公嘗創立綱紀區分異同得之于心假之于手以授博聞強識之士濟南林寶寶該覽六藝通知百家東漢有紬書之能太常當典禮之職其爲述作也去華摭實亡麤得精條貫稟大賢之規網羅盡天下之族雖范宣子稱其世祿司馬遷序其先業若揭日月備于縑緗昭然蔑以加此矣以涯嘗學舊史繆官綸閣授簡爲序不敢固辭無能發揮承命而已矣元和七年壬

辰十月中大夫行兵部員外郎知制誥王涯述

元和姓纂卷一

唐林寶撰

陽湖孫星衍

歙洪瑩同校

李據序稱皇族之外各依四聲韻類集今仍以李置卷首如林氏舊例

帝顓頊高陽之裔顓頊生大業大業生女莘女莘生咎繇爲

堯理官子孫因姓理氏云云裔孫理徵得罪于紂其子利貞

逃難伊侯之墟食木子得全因變姓李氏利貞十一代孫老

君名耳字伯陽居苦縣賴鄉曲仁里曾孫曇生二子崇璣崇

子孫居隴西璣子孫居趙郡崇五代孫仲翔生伯考伯考生

尙尙生李廣也廣以後生唐高祖李淵

祕笈新書

一東

馮

周文王第十五子畢公高之後畢萬封魏支孫食采於馮遂

氏焉世本又云姬姓鄭大夫馮簡子後漢書秦末馮亭爲上

黨守入趙其宗族或畱潞或在趙秦丞相馮去疾御史大夫

馮劫漢博成侯馮毋擇並亭之後也至馮唐徙安陵爲楚相

弟騫自上黨徙杜陵孫奉世大將軍生譚迨案馮奉世爲左將軍此作大將

軍誤又譚遠下脫立參二字野王野王左馮翊立上郡太守參宜都侯漢

功臣又有闕氏侯馮解散穀陽侯馮谿傳封六代後漢司空

馮勤魏郡人馮衍杜陵人生豹尚書司空魴南陽人廷尉馮

緄巴郡人案闕氏侯馮解散漢功臣表作闕氏節侯

潁川後漢征西大將軍夏陽侯馮異

上黨漢左將軍馮奉世本世居上黨也

長樂信郡漢宜都侯參後晉有馮和孫跋僭號都龍城稱

北燕弟弘爲後魏所滅弘生朗生姬姬女弟魏文成皇后燕

熙孫子琮北齊左僕射昌黎公

案北史馮熙文明太后之兄父朗追贈燕宣王熙生誕

生穆穆生問襲爵昌黎王又北齊書馮子琮馮跋之後父靈紹子慈正此文內姬字疑係熙字之誤熙孫子琮曰字亦誤

疑燕字下有脫文

生慈明慈信慈讓慈明生惇怵怵兵部郎中生騫

汾州刺史慈明孫慶雅州刺史慈讓生摠擲捷摠監察御史

生元常右丞兵部侍郎元常生光嗣齊州刺史孫令問侍御

史思雍刑部郎中捷生淑祠部郎中

京兆 狀稱弘後隋有兵部尙書馮業生長命唐尙書左丞

長命生義弘禮本義弘膳部郎中禮本司農少卿本足子昭

泰刑部刺史安昌公

案張說集括州刺史工部尙書馮昭泰碑會祖兵部尙書世基此避唐諱作業

又曰考仁高亮無祿故昭泰幼襲安昌公此作本足子當有訛又考昭泰嘗官邢州刺史此作刑部亦誤

生紹正

紹烈紹正少府監紹烈兵部郎中鴻臚卿又銀青光祿大夫

直昭文館紹烈生敦直從祖弟師訓右領軍將軍師訓生嘉